

О нем же пришедшим и сугубѣ сущемъ естествомъ бога и чловѣка глагола она моляс о немъ богу и отцу, глаголя: «боже, суд твой цареви дай и правду твою сыну цареви судити людемъ твоимъ правдою и нищимъ твоимъ судомъ». Сицевымъ же молится о немъ, акы о чловѣцѣ, яко же богъ бо иматъ сѣя въ естествѣ в'сажена, яко же самъ глаголетъ, отецъ (л. 303) судитъ ни единому, но вес суд далъ естъ сыну, да вси почитаютъ сына, яко же почитаютъ отца, а яко конецъ прѣятъ сицевая молитва бога отца, никто же противляяся, вездѣ бо по подсолнечнѣй въспаша луча разумнаго солнца правды просвѣщающе душа богопокорно и благо разумно прикляющихъ выся своя подъ иго благое евангельскихъ велѣній и лѣхкое бремя ихъ съ усердіемъ приемлющихъ, яко же и божественый Аввакумъ, о немъ же предвзвѣщаетъ, глаголя: «Покры небеса добродѣтелъ его и хваления его испльнь земля, и сіаніе его, яко же свѣтъ будетъ» и прочая... Но яко же повышше предрече ми ся, и нынѣ глаголю: Да исчезнетъ отъ всякыя благовѣрныя мысли всяко ласканіе и лѣжа и завистливъ обычай, истину же и правость права да любитъ всякъ и нарочитая и достохвалная исправления царствующихъ благовѣрно и якоже богу благоугодно естъ не мльчаніемъ миновати, ни забвенію предати, завистию побѣждаемъ, но да хвалитъ я у себе и инымъ вѣдома да творитъ, да презѣлнѣ въспѣваемъ бываетъ и славится царь царствующихъ и господь господствующихъ, отъ него же учинени сѣтъ по божественому апостолу сущая на земли власти, отъ нихъ же едина естъ изрядна и свѣтлѣйша царствіе твое, еже по отческому жребію многолѣтному дошедше даже до твоего благовѣрія, благочестивѣйший самодержьче всея Руси, государь князь великий Иване Василіевичъ, ему же вручену бывшу ти отъ вышняго богочначалія, правись е всякою правдою и правосудіемъ, очищая е (л. 303 об.) премудрѣйшими умышленіи и строеніи отъ всякаго неправдованія разбойничества же и кровопролитія неправеднѣйшихъ и клеветникъ бездушнѣйшихъ и вльшебныя прелести и всяческыя сатанинскыя играніи чюественныхъ бѣсовъ, слуговъ антихристовыхъ, пленящихъ душа вѣрныхъ въ всякыя богомрѣзскыя блуженіи, яко и намъ съ необиновеніемъ мощи глаголати и о твоёмъ царствіи рѣчи пророчскыя молитвы, глаголюща: «Боже суд твой цареви нашему далъ еси и правду твою сыну цареви, яко судити людемъ твоимъ правдою и нищимъ твоимъ судомъ и избавляти сыны убогихъ отъ насильствующихъ я и обидящихъ люте, тѣмъ же никто же толь готовъ и усерденъ, якоже избранный твой царь и защититель нашъ въ еже пособляти обидимымъ и отмѣстити насилничаемыхъ, поминая добрѣ молящагося тебѣ пророка и царя глаголющаго: «Сътвори хъ судъ и правду, не предажь мене обидящимъ мя видимымъ и невидимымъ врагомъ». Утишила ся земля древлѣ.